

嶺南道

卷百六十一

賀州

富川

高州

電白

潘州

卷百六十二

桂州

靈川

興安

陽朔

場

卷百六十三

儀州

新州

賓州

信宜

正義

昭州

富州

蒙州

東區

正

潯州

桂平

卷百六十四

康州

瀧州

封州

封川

開建

梧州

戎城

卷百六十五

鬱林州

賓州

澄州

上林

象州

武化

太平寰宇記卷之一百六十一

臨賀郡

嶺南道五

賀州

高州
領廢
潘州

賀州

賀州

臨賀郡今
理臨賀縣

禹貢荊州之域春秋時通為越地七

國時為楚地秦始皇三十年置南海郡即其地也

秦末趙佗王南越其地屬焉漢武帝元鼎六年平

南越置蒼梧郡屬交州今州即蒼梧郡之臨賀縣

吳黃武五年割蒼梧郡封陽臨賀馮乘富川蕩山

桂嶺等六縣為臨賀郡晉因之宋文帝改為臨慶

國齊復爲臨賀郡陳因之隋平陳置賀州煬帝改爲臨賀郡唐武德四年平蕭銑復置賀州天寶元年改爲臨賀郡乾元元年復爲賀州

元領縣六 今三

臨賀 富川 桂嶺

三縣廢

蕩山

入臨賀

封陽

入臨賀

馮乘川

入富賀

州境

東西三百三十里

南北五百七十里

四至八到

東北至東京三千一百六十里

西北至西京三千五百七十二里

西北至長安四千一百九十二里

東至連州三百六十六里

南至封州三百六十一里

西至昭州龍平縣三百六里

北至道州三百四十五里

東南至廣州八百七十五里

西南至梧州四百一十二里

西北至桂州五百六十里

東北至永州隔山嶺無路

戶

唐開元戶四千五百

皇朝戶主四千六百九十七客一千七百六十二

風俗

俗重鬼嘗以雞骨卜漢書云越巫以雞骨卜有草名冠脫高一丈葉如荷而莖中有瓢音穰又俗多構木為巢以避瘴氣豪渠皆鳴金鼎食所居謂之柵節會則鳴銅鼓大者廣一丈小者三四尺好吹匏笙俚人削筋竹為箭以葉羽之名曰圭黎

土產

黎母汁二餅開寶四年準宣旨進 蚺虵膽貢

千金藤葉 白蠟 山鍾乳有五穴 五茄穴在臨

靡無穴 白鷲穴 秦穴 雷震穴在富川縣

蝟蝟大障山都貴源出蝟蝟夷人取血以解毒蝟蝟音資攜大龜也 龍鳳花紋

簞新貢

臨賀縣舊五鄉今二鄉本漢縣因縣置郡以邑內臨水賀水

為縣名皇朝開寶四年廢蕩山封陽二縣並寶城

場入縣 臯亭屯按荊州記云臯亭屯有青石方

三丈許石上有磨刀斧跡春夏明淨有新磨處秋

冬漸生苔穢傳云是雷公磨霹靂 大竹盛弘之
荊州記云臨賀山中有二竹大數十圍有磐石徑
四五丈方正青滑如彈棊局兩竹屈垂拂掃石上
絕無塵穢未至數十里聞風吹如笙簫之音 巢
竹地土有巢竹叢生如大戟堅中俚人以爲矛
斨竹有毒人以爲弧刺虎中之則死 幽山在縣
西十里南接蒼梧北通道州山上有古度木實大
如珠結成後數日化蟲飛去 臨水源出馮乘縣
西北靈山下南流至縣界 溫泉去縣東北四十
五里源出劣下山半巖石壁中出泉三道一道水

熱一道水冷一道水溫其泉石各有眼五十步作
二舍引流熱泉治瘡癩並西流入于錫溪 錫溪
水在縣東北四十五里源出錫山其水清冷人久
飲則損腰腳今土人多患跛躄 廢蕩山縣在州
西一百七十里隋大業二年廢臨賀郡置綏越縣
屬始安郡續又改綏越縣爲蕩山縣因界內有蕩
山爲名皇朝廢入臨賀縣爲招賢鄉 早山在縣
南四十里高一千餘丈周迴三百里其山春前花
卉競發朝陽早見俗呼爲早山 蕩山 祥山二
山孤峙並無連互 祥溪水出于祥山 廢封陽

縣在州南一百四十里漢舊縣屬蒼梧郡在封水之陽因爲縣名皇朝廢入臨賀縣爲信都鄉長林山在東北三十五里高五百丈周迴七百里多橄欖樹似訶黎勒食之甘脆龍水封陽有隄陂龍水深百尋大魚自擲登此門者化爲龍不過者曝腮點額廢寶城場古劣下場改名寶城場出白蠟二萬九千觔今併入臨賀縣爲溫泉鄉也

富川縣

西北一百里元二鄉今三鄉

輿地志云漢舊縣屬蒼梧郡

吳黃武五年改爲臨賀郡縣有富水因爲縣名皇朝割馮乘縣入縣額富水在縣西四十里源出

浮蓋山下南流入富州思勲縣其水灌注田疇居人豐贍因名富水廢馮乘縣在州北一百二十里漢舊縣屬蒼梧郡隋大業二年隸零陵郡皇甫謐云舜葬蒼梧九疑山在馮乘縣東與道州營道縣接境皇朝廢入富川縣秦山在縣北三十里高二千餘丈南接富川北連道州吳孫權未立時此山夜忽聞有雷聲因開六洞南北可數十里出水其中有石鼓石柱石壇仙溪水在縣南十里源出靈山此溪石上多菖蒲傳云仙人所種飲此水者可獲長壽

桂嶺縣

東北八十二里元二鄉

輿地志云隋開皇九年東萊公

王景巡撫分興安為二縣西為桂嶺縣屬臨賀郡

桂嶺山在縣東北一百五里高三千餘丈東接

連州北連道州山有桂竹桂木 越王渡在縣南

二十七里賀水邊有石平正文餘長有履迹各長

九寸相傳為越王渡按荊州記云賀水邊石上有

石櫛石履俗云昔越王渡水脫履墮櫛于此二物

今猶見在 歌山馮乘有老人少不婚娶善于謳

歌聞者涕流及病將死鄰人送到此老人歌以送

之餘聲滿谷數日不絕 蕪城池湟中頗出珠玉

寶器即尉佗拒防之所 黎狸之品類也 有

囊狸卵生大如狗屯狸黃狸長五六尺其聲自號

一曰雞狸 狎狸能緣木食果子色黃 雷狸聲

自號色黃蒼 掘螺狸口尖能取螺食 狗狸狀

如狗尾大如斗在草中吠人 通額狸黃黑色而

首白如脂從鼻上通額中入頭上 豨狸如猪

嚶狸色青黃聲嚶嚶聞數里一體自有雌雄而牝

牡自給其香如麝自歌山已下皆郡內之事也

高州

高州

高涼郡今理電白縣

秦已前土地與晉康郡同一漢屬合

六平纂字記 卷之十一 六十一 六
浦郡吳置高涼郡又立高興郡晉亦如之其後悉
并于高涼齊亦爲高涼郡兼置高州隋平陳郡廢
而州存煬帝初州廢屬高涼永熙二郡地唐武德
初復置高州貞觀二十三年分西平杜陵置恩州
高州移治良德縣天寶元年改爲高涼郡乾元元
年復爲高州按投荒錄云高涼郡土厚而山環遶
高而稍涼故以爲名大厯十一年以良德縣川原
險狹不通舟楫移州于電白縣皇朝開寶五年并
良德保定二縣入電白縣仍廢潘州以潘州南巴
潘水二縣并入茂名縣來屬

元領縣三

今一

電白

一二縣廢

良德

保定

已上並入電白

廢潘州元領縣三 今一

茂名

一二縣廢

南巴

潘水

已上入茂名

州境

東西二百四十里

南北一百六十里

四至八到

北至東京五千二百六十里

北至西京五千五百二十里

西北至長安六千二百六十二里

東至廣州一千二百里

西至賓州九十里

南至化州三百四十里

北至廢瀧州一百七十里

東北至春州三百四十里

西南至化州一百五十里

西北至賓州一百里

西南至廢潘州八十五里

戶

高州唐開元戶五千八百五十二

廢潘州天寶戶四千三百

皇朝兩州合爲兩縣管戶主二千四百九十四

風俗

其俗生時布衣不充死則盡財殯送父子別業兄弟異財無故帶刀持矛執劍相侵則鳴春堂集子弟和則殺牛市則二日一合

人物

唐高力士

潘州人爲驃騎大將軍封齊國公

土產

高州果下牛高二尺

驃馬牛尾

蚺蛇膽

貢

孔雀

高良薑

益智子

電白縣

元四鄉今三鄉

梁置電白郡隋爲縣

廢良德縣在

舊州西北三十七里漢合浦縣地屬合浦郡吳置

高涼郡宋齊不改

廢保定縣在舊州東二百二

十五里舊保安縣唐至德二年改爲保定已上二

縣皇朝併入電白縣

茶山南越志滇陽縣北五

里有茶山山有熱泉源自沸湧卉服竄之不沾王

化百姓荒居昔有俚豎牧牛于野一牛炊

音隨而

舐之舉體白淨如洗屑也旬日而殞其牛竟爲人

殺而噉之者百許人一日俱變而成獸吼喚驚懼

各走入山初尙有衣裳形未甚異時知還家後性

狀稍改遂不復歸由是羣黨相逐連城爲患今獮

似猩猩而小于獸或能化爲人形隨復化爲獸謂

之獮卽此類也

帽澇山在廢良德縣界北至州

三十九里當亢陽山有雲如帽卽雨山下卽帽澇

之水出焉

巨海南越志平定縣界東有巨海鳴

波浩蕩出駢馬似馬而牛尾一角水犀似牛魚似龍一曰龍鯉又云宋康郡化隆縣海高多珠鼈狀如肺有四眼六腳而吐珠又有文魮及鹿魚文魮魚鳥頭魚尾鳴如磬而生玉 射狼山在良德縣界去州十里古老相傳人射狼于此 高涼山在良德縣去州十里 射潤山 甘遠山在保寧縣界去州一百二十里兩山相對雲雨連接以潤爲名 射賴岡在電白縣界去州二十里 波浪山在良德縣界去州七十里岡巖如波浪古老相傳海沫漂成 射合山岡在保寧縣界去州二十六

里 帽澇水出帽澇山下 衛韋水在良德縣界

進田水在良德縣界 快蛇水在保寧縣界

海水在保寧縣界南十里接恩州 馮家村馮益

卽此界人也 洗氏墓高涼人乳長七尺

茂名縣 西南八十五里 舊五鄉今三鄉 古西甌駱越地秦屬桂林郡

漢爲合浦郡之地隋置定川縣唐武德四年平嶺表于縣置南宕州後改爲潘州仍改縣爲茂名以道士潘茂姓名爲縣名也梁開平元年改爲越裳縣後唐同光初復舊皇朝開寶五年廢潘州以本州南巴潘水二縣并入茂名割屬高州 廢潘州

本南潘郡治茂名縣秦屬象郡二漢屬合浦郡唐武德四年置南宕州領南昌定川陸川思城溫水宕川六縣治南昌縣貞觀六年移理定川八年改爲潘州仍廢思城縣天寶元年改爲南潘郡乾元元年復爲潘州按嶺表記潘州因道士潘茂昇仙遂以姓名爲郡縣之稱 潘山在縣東三十里其山昔有潘茂于此煉丹昇仙乃以爲山名 仙山在縣西南二百步隔水亦潘茂煉丹之所今有昇眞觀 霧嶺岡在縣南五里其山下有湖水方廣二里天寶二年因大風雨湖心忽涌出小洲至今

生草木 思乾井在縣東一里潘真人煉丹之味甚香美煎茶試之與諸水異高力士奏取其水歸朝 高力士宅墓在縣西二百四十步力士茂名縣人也 廢南巴縣在縣東一百里隋廢縣唐武德五年取縣東一百里南巴山爲名 廢潘水縣唐武德五年分置以縣界水爲名 浮山其山高七百尺堯時洪水泛溢此山獨浮人居山上得免沈墊人呼爲浮山 馮益墓在舊縣東南十五里有碑云馮府君之墓 毛山在舊縣東二十里古老相傳云昔有毛女隱此因以爲名 玄宗聖

容按郡志故右衛大將軍高力士舊鄉郡有驃騎館相傳皆因力士之名開元年中天下鑄聖像郡皆一而潘獨二力士以其本鄉故自鑄其一也

校勘

賀州

總序

吳黃武五年割蒼梧郡封陽臨賀馮乘富川蕩山桂嶺等六縣爲臨賀郡

按今記蕩山桂嶺皆隋所改置黃武中不應已有蕩山桂嶺之名當時割其地而追錄之爾

隋平陳置賀州煬帝改爲臨賀郡唐武德四年平蕭銑復置賀州

按隋書地理志始安郡富川縣舊置臨賀郡平陳郡廢置賀州大業初州廢又廢臨賀賀綏越蕩山三縣入富川詳此則煬帝但廢賀州及臨賀縣初無改爲臨賀郡之文又今記序廢蕩山縣亦云大業二年廢臨賀郡州序所載蓋脫誤也

風俗

有草名冠脫

按爾雅名活菟恐古今語誤耳菟音奪

臨賀縣

廢蕩山縣 隋大業二年廢臨賀郡置綏越縣屬始安郡又改綏越縣為蕩山縣

按隋志賀州及臨賀綏越蕩山三縣大業初皆廢入富川縣今云廢郡置綏越恐誤又蕩山及綏越乃兩邑同時皆廢今云改綏越為蕩山亦誤又按新唐書地理志蕩山天寶後置是隋已廢至唐復立後更廢也今記亦闕不載

桂嶺縣 總序

隋開皇九年分興安為二縣西為桂嶺縣按隋志桂嶺縣舊曰興安開皇十八年改名焉今云分為二縣或恐既分而又合為一史但據改名之歲併書之耳當考

太平寰宇記卷之一百六十一終

太平寰宇記卷之一百六十一 三

太平寰宇記卷之一百六十二

嶺南道六

桂州

桂州

始安郡今理臨桂縣

禹貢荊州之域春秋時越地七國時

服于楚戰國時為楚越之交境秦始皇三十三年

發諸嘗逋亡人贅壻賈人畧取陸梁地是為桂林

郡二漢屬零陵蒼梧二郡吳甘露元年于桂林置

始安郡東晉孝武帝改為始建郡宋不改蕭齊復

為始安郡梁天監六年立桂州于蒼梧鬱林之境

無定理處大同六年移桂州于今理隋平陳廢始

安郡所領縣並入桂州乃置總管府大業元年廢
總管府置都尉府三年罷州爲始安郡唐武德四
年平蕭銑復置桂州總管管桂象靜融樂賀荔南
昆龍九州并定州一總管其桂州領始安福祿純
化興安臨源永福陽朔歸義宣風象十縣尋改定
州爲南尹州其年又置欽州總管隸桂府五年置
南恭鷲梧三州隸桂府九年置晏州隸桂府貞觀
元年又以欽玉南亭三州隸桂府二年省玉州南
亭州五年置賓州隸桂府六年又以尹藤越白相
繡鬱姜南宕南方南簡南晉十二州隸桂府其年

置龔州都督亦隸桂府其年廢龍鬱二州八年改
越州爲廉州南簡爲橫州南方爲澄州南宕爲潘
州南晉爲邕州尹州爲貴州靜州爲富州樂州爲
昭州南昆爲柳州銅州爲容州廢福祿歸義二縣
十年廢姜州十二年廢晏州以建陵縣來屬廢荔
州以荔浦崇仁二縣來屬省宣風縣今督桂昭賀
富梧藤容潘白廉繡欽橫邕融柳貴十七州天寶
元年改爲始安郡依舊都督府至德二年九月改
爲建陵郡乾元元年復爲桂州刺史充經畧軍使
北界有越城嶺今謂之臨源嶺卽五嶺之一也

元領縣十

今縣十一場一

臨桂 靈川 興安 陽朔 永福 修仁 理

定 慕化 荔浦 豐水 義寧新置 古縣場新置

州境

東西六百里

南北五百五十里

四至八到

北至東京陸路三千六百七十九里水路四千六百三十里

北至西京陸路三千四百五里水路四千三百二十有三里

北至長安三千七百五里

東至昭州陸路三百三十里

南至象州陸路五百二十里

西至柳州五百四十里

北至道州陸路四百八十里

東南至賀州五百三十一里

西北至融州陸路四百九十里

東南至梧州水路六百三十里

西北至西演嶺接敘州朗溪縣界一百五十里

戶

唐開元戶一萬七千五百九十七

皇朝戶主一萬六千七百一十九客七千七百一

十九

風俗

按漢書云吳越之君皆好勇故其民皆好用劍輕死易發又火耕水耨人食魚稻以漁獵山伐爲業果蓏贏蛤食物嘗足故^{音紫}啻^{音麻}偷生而無積聚飲食還給不憂凍餓亦無千金之家信巫鬼重淫祀

人物無

土產

朱砂 冷石 零陵香 桂心 銀 麋皮 簞

銅器 蚺蛇膽

臨桂縣元十州所治漢始安縣元鼎六年置屬零陵

郡吳分置始安郡梁置桂州隋末復爲始安郡縣

界有灘水遂一名桂江有荔水亦曰荔江其江源

多桂不生雜木故秦時立爲桂林郡唐至德二年

改爲臨桂縣 逍遙樓在州城東角上軒楹重疊

俯視山川宋考功陪王都督登樓詩云晦日登樓

望江山一半天卽此也 迴濤堤在城東南十五

步桂江西岸水自嶺南流桂嶺去州二百餘里水勢極高每年三月至五月大水瀑漲淹浸城池唐貞元十四年刺史王琪築此堤長五百四十五步以捍水勢居民免墊溺之患 駁鹿山一名福祿山在州東北一十五里 灘山在城南三里灘水之陽因以名焉一名沈水山其山孤拔下有澄潭上高三百餘尺周迴二里可容五百家旁有洞穴廣數丈南北直透上有怪石欹危藤蘿榮茂世亂民保以避寇旱或禱祈頗靈 隱山在州之西郊先是榛莽翳蒼古莫知者唐寶曆初李渤出鎮遂

尋其源見石門半開有水淵澈乃夷蕪蕪疏通巖穴石林磴道若天造靈府不可根本因號隱山 彈丸山在縣東二里隔灘水按酈道元水經注云山有湧泉奔流迅激東注于灘水龕及溪中有石如彈丸因以爲名驗其山高十餘丈周迴三四里復有石竇下深數丈洞穴深遠莫究其極 獨秀山在城西北一百步直聳五百餘尺周迴一里平地孤拔秀異迴出郭中下有洞穴凝垂乳竇路通山北傍迴百餘丈豁然明朗宋光祿卿顏延之牧其郡嘗于此石洞中讀書賦詩云未若獨秀者

大平寰宇記 卷之一百六十二 五
嵯峨郭邑間 南溪山在縣南五里其山聳拔千
尺烟翠凌空其溪水東注于桂江合流沂五里卻
合陽江直抵隱山縈帶二十餘里通舟楫于二江
之上下 灘江一名桂江出臨源縣東南 陽海
山漢志零陵縣陽海山灘水所出漢武帝討南越
遣歸義越侯嚴爲戈船將軍出零陵下灘水 湘
水今名小湘江源出臨源縣陽海山湘灘同源出
分爲二水水在全義嶺上南流爲灘水北流爲湘
水羅含記云湘水出于陽朔則觴爲之舟至洞庭
日月若出沒于其中 甘水在靈川縣北三十里

其源出融州北界潭洞涓流引派百餘里經靈川
縣西南穿過大山下縈迴五百餘步江闊十丈深
一丈東流經甘棠驛南而東注灘水今邑人呼爲
甘巖卽此水也 陽江在縣南二里源出靈川縣
界思慕山下東流百餘里漸勝舟楫出郊郭之中
東流合于桂江 紫家洲在子城東南百餘步長
河中先是紫家所居因以名焉每經大水不曾湮
沒相傳言浮也又云昔歐陽都護墳土流下成此
洲 顏延之宅在獨秀山下按山在郭中居子城
正北百餘步高聳約十二丈周迴一里餘迴出郭

中下有巖谷舊有宋時名儒顏延之居讀書亭後
爲從事所居住往往見精靈居者罕寧 歐陽都護
墳在府北郭外松林盡處唐初安南都護名普贊
本靈川人也舊宅今聖壽寺是也有廟在寺北垣
下 會仙里南去縣五十里舊有羣仙會于此輜
輶羽駕遍于碧空竟日而去里人聚而聞之名爲
會仙里 雙妃冢高十餘丈周迴二里舊傳二妃
尋舜而卒葬于此處 伏波廟在郭中府之東北
二里卽馬伏波之祠唐乾符二年勅封爲昭靈王
越王廟鄉黨祈禱之所 舜廟虞山之下是祠

舜設廟之處又有潭號曰皇潭言舜南巡遊其潭

因名

靈川縣

東六十里
元十鄉

唐龍朔二年分始安縣置東臨江

冷石山在縣西南一百里出滑石 堯山在府

城東北四十四里按史傳堯封里不到蒼梧以其

西與舜祠相對邑人慕堯之風遂名爲堯山 銀

江水源出縣西北東流合灘水

興安縣

北一百五十
里元五鄉

本漢始安縣地隋置臨桂鎮武

德四年析始安置臨源縣大厯三年土將萬重光
誘臨桂等九縣構逆唯臨源縣獨守臣節改爲全

義縣皇朝太平興國二年避御諱改爲興安縣
湘水出縣東南八十里陽海山水計北流經縣理
東又北流入永州界 陽海山在縣城北一百七
十里屬興安縣按酈道元注水經云陽海山一名
陽朔山其山自永州零陵縣西南迤邐岡巒連互
不絕此山卽湘灘二水之源南爲灘水北爲湘水
卽此水也 龍蟠山在郡城東北一百七十里屬
興安縣本名蟠龍山天寶六載勅爲龍蟠山有石
洞洞門數里人秉燭遊于迴溪泥沙中嘗見龍跡
其大如盃洞中之水有魚四足而有角人不敢傷

恐致風雨嶺表錄異云全義嶺之西南有盤龍山
山有乳洞斜貫一溪號爲靈水溪入靈川縣界溪
內有魚皆修尾四足丹其腹遊泳自若漁人不敢
捕之爾雅云鯢似鮎四足聲如小兒今高州山溪
內亦有此魚謂之納魚卽此類也 越城嶺一名
始安嶺在縣北三里卽是五嶺從東第五嶺 秦
鑿渠在縣南二十里本灘水自柘山之陰西北流
至縣西南合零渠五里始分爲二水昔秦命御史
監祿自零陵鑿渠至桂林故漢歸義越侯嚴爲戈
船將軍出零陵下灘水卽此郡郡志後漢伏波將

軍馬援開湘水爲渠六十里穿度南城今城南流者是因秦舊瀆耳至唐寶厯初渠道崩壞舟楫不通觀察使李渤遂疊石造堤如鐸觜劈水分二水置石斗門因便制之在人開閉開灘水則全入於桂江擁桂江則盡歸于湘水又于湘水鑿分水渠三十五步以便行舟灘水經縣郭中而流 陽海祠在縣南乃灘湘二水之源也流至縣北三百步分流爲湘江南爲灘江其下有廟後封爲廣濟侯

陽朔縣

南一百四十二鄉

本漢始安縣地隋開皇十年置

在灘水東二十里永樂水西 烏澣郡國志云陽

朔縣有夷人名烏澣在深山洞內能織文布以射翠取羽割蚌取珠爲業 竹皇祠郡國志云竹王者女子浣衣水次有三節竹纏足閒推之不去中有聲破之得一男兒養之有材武遂雄諸夷地今寧州始興三狼烏澣卽竹王之遺裔故有竹王三郎祠於此地

永福縣

西南一百一十二鄉

本漢始安縣地隋開皇十一年割

始安縣永福鄉于廢龍口戍置 白石水東北自臨桂縣來經縣理東又西南入理定縣界 永福山在邑界

修仁縣

西北三百四十里元二鄉

本漢荔浦縣地吳孫氏置建陵

縣梁武帝立為郡隋開皇十年廢郡為縣唐長慶

三年桂管觀察使殷侑奏縣名與肅宗陵號同今

縣有修仁鄉請改為修仁縣 建水出縣北建山

南流經縣東 駱駝水在縣西七里源出龐山下

西南流注連水 崇仁水源出謝山東流合白石

水

理定縣

西南三百里元四鄉

本漢始安縣地隋仁壽初分置興

安縣唐至德二年改名理定縣 蘭麻山屬縣界

在府城西南二百里從府向柳州路經此山過溪

百餘里方至平路山中有毒出路尋溪水行其溪

水有伏流有平流峭絕險隘更無別路其山自衡

岳迤邐南亙于邵州融州等界到此過入柳州象

州山闊一百里高二十餘里 橄欖山在邑界

慕化縣

西南二百二十里元二鄉

本漢潭中縣地晉太康元年分

吳所置武豐縣置長安縣于此蕭齊又于縣理置

常安戍梁大同八年于縣置梁化郡改長安縣為

梁化縣十八年改梁化縣為純化縣大業二年省

唐武德四年復置純化縣永貞元年十二月改為

慕化縣以避憲宗廟諱梁開平元年復為歸化縣

後唐同光初復爲慕化縣 常安水源出縣西南二十九里須離山東北流經縣南又經縣東屈而東南流經福水西又南注白石水

荔浦縣

南二百四十里元二鄉

本漢縣屬桂林郡唐貞觀三年

于此置荔州十三年州廢復爲縣以隸桂州在荔江北以江爲縣名 臥石郡國志云其形似人而舉體青黃隱起或謂之石人可以祈雨小舉則小雨大舉卽大雨 建水水口有尉佗伏波之廟 湘水卽小湘江也 荔江今名荔水漢志荔浦縣有荔平關源出崇仁縣西北荔山 荔溪地志記

云荔溪原多桂桂所生處不生雜木樵採皆桂

方山對九疑山高下皆類

豐水縣

南二百一十里元二鄉

本漢荔浦縣地隋置永豐縣唐

長慶三年觀察使殷侑奏與信州永豐縣同今縣下有豐水請改爲豐水縣 豐水源出思君山下 姜女山白面山皆在邑內

義寧縣

東八十里元一鄉

晉天福八年析靈川縣歸義爲場

復昇爲義寧縣

古縣場

西南一百五十里十鄉

唐乾寧二年分慕化縣之里一

鄉爲古縣場

南越志云桂林郡本治陽溪今移

在鬱江口有銅鼓灘是也武熙縣有桂山圍山本草云桂生山谷久服令身輕又平陽縣有陽溪在縣西數百里伏流通于岷山又云潭中縣二百里則桂林故郡所理也中留縣秦置也次三百里至于江則桂江也與鬱林合浦水並歸于海建興三年諸葛武侯南征遂分建寧牂柯二郡地爲興古郡延康元年步騭交州兵出自長沙趨于此道故吳書曰權遣呂岱代騭將交州義士萬人出長沙會玄德東下武陵蠻夷蠢動逆命騭士並降劉旣敗績而零陵桂林諸郡猶相驚擾騭周旋征討皆平之有古終藤俚人以爲布故夏書曰島夷卉服此之謂也

校勘

桂州

臨桂縣

紫家洲

按柳子厚有桂州紫家洲亭記今作紫當考

永福縣 總序

隋開皇十一年割始安縣永福鄉于廢龍口

戊置

按新舊唐書地理志桂州永福縣武德四年析始安置元和郡縣志同隋志始安郡無永福縣今云隋開皇十一年置未知據何書

太平寰宇記卷之一百六十二終

太平寰宇記卷之一百六十三

嶺南道七

南儀州

新州

賓州

昭州

蒙州

潯州

南儀州

南儀州

連城郡今理岑溪縣

土地所屬自秦以前與潘州同漢

置蒼梧郡今州即蒼梧郡之猛陵縣地也猛陵縣

今梧州界隋為永熙郡之永業縣唐武德五年江

表底定於此置南義州及四縣貞觀元年州廢以

所領縣入南建州二年復置義州還以故縣來屬

太平寰宇記 卷之一百六十三
五年廢義州又以縣屬南建州六年復置義州又
割故縣來屬天寶元年改爲連城郡乾元元年復
爲義州皇朝開寶四年平南越廢入賓州至六年
復置從民之便其三縣仍併爲一縣太平興國初
改爲南儀州

元領縣三

今一

岑溪

二縣廢

連城

永業

州境

東西八十里

南北九十里

四至八到

西北至東京約七千餘里

西北至西京約七千餘里

東北至長安取康州路七千五百里

東至梧州嶂嶺一百七十里

西至容州六十五里

東北至藤州二百里

北至廣州水路一千九百里

南至容州普寧縣界二十里

西南至容州九十五里

東北至梧州五百里

戶

唐開元戶九百二十九

皇朝戶主客六百三十八丁

本州只供丁不供戶

風俗

俗不知歲唯用八月酉日為臘長幼相慰賀以為
年初每月中旬年少女兒盛服吹笙相召明月下
以相調弄號曰夜泊以為娛二更後匹耦兩兩相
攜隨處相合至曉則散男兒以白布為頭巾女兒

以布為衫

土產

出縮砂仁

岑溪縣

舊三鄉今四鄉

州所理漢猛陵縣屬蒼梧郡唐武德

四年置龍城縣于縣置南義州貞觀初廢二年復

置義州領龍城安義連城義城四縣至德中改安

義為永業龍城為岑溪 廢永業縣在州東北一

百里舊安義縣至德年中改 廢連城縣在州東

南八十里武德五年分瀧州之正義縣置已上二

縣皇朝廢入岑溪縣 龍城砧山形似砧也 羅

山山有冷泉飲者愈熱病 龍驤水昔龍驤將軍
陳隱鎮此因名也 馬頭嶺 岑溪皆在郡 城
麻場新置

新州

新州

新興郡今理新興縣

古越地秦始皇略取陸梁地置象郡

今州則其地也漢為合浦郡之臨允縣晉穆帝永和七年分蒼梧郡于此置新寧郡輿地志梁武帝割廣州新寧一郡立新州隋為信安郡唐武德四年平蕭銑復置新州天寶元年改為新興郡乾元元年復為新州

元領縣三

今一

新興

二縣廢

索盧

舊廢

永順

今并入新興

州境

東西二百七十四里 南北二百九十五里

四至八到

東北至東京水路五千四十一里

西北至西京五千四十一里

西北至長安取端州路五千二里

東至廣州二百七里

西至康州悅城山為界一百三十里

南至恩州三百八十里

北至端州一百三十五里

東南至廣州義寧縣五十四里

東北至端州一百一十里

西北至舊勤州一百六里

西南至春州二百六十里

戶

唐開元戶二百五寸

皇朝戶主六千八十七客一百二十一

風俗

俗以雞骨占吉凶漢書云越巫以雞卜此也衣服
即都落古貝蕉布豪渠之家喪祭則鳴銅鼓召眾
則鳴春堂巧作木壘藤帽五色藤箱蓆

土產

金貢 牛黃 紵布 都落布 銀山出銀爾雅

云白金謂之銀其美者謂之鐐盧循採之山多香

木謂之蜜香辟惡氣殺鬼精

新興縣舊十二鄉 漢臨允縣屬合浦郡晉置新寧郡

大平寰宇記 卷之一百六十三 五
梁置新州 廢永順縣在州北四十五里唐武德
四年析新興縣置皇朝併入新興 廢索盧縣唐
武德四年析新興縣置今廢 桂山在新會縣西
南三十四里南越志云此山鳥則翡翠孔雀獸則
玄猿鼯鼠 利山在新會縣東一百七里南越志
云此山多沈香木 南海在新會縣南一百五十
里有穿洲襟帶甚遠山挺方木水含珠母海人以
爲鮓醬秘之而餌其肉又洲有火齊雲母又云有
浮石又曰海昌郡威寧縣有穿洲其上多綸木注
云似穀皮可以爲綿但獠緝以爲絮 三章溪南
越志云允吾縣南有三章溪溪有三源也

竇州

竇州

懷德郡今
理信宜縣

古越地秦屬海南郡漢屬蒼梧郡隋

爲永熙郡武德四年置南扶州及五縣以獠反寄
治瀧州貞觀元年廢以所管縣並屬瀧州二年獠
平復置南扶州自瀧州還其故縣五年復廢縣隸
瀧州六年復置以故縣來屬其年改南扶州爲竇
州以羅竇洞爲名天寶元年改爲懷德郡乾元元
年復爲竇州

元領縣四

今一

信宜

三縣廢

懷德 潭峩 特亮 併入信宜

州境

東西一百三十里 南北一百六十里

四至八到

西北至東京五千里

西北至西京五千三百五十五里

西北至長安取瀧康東路六千二百二十一里

東至高州一百里

西至舊潘州一百六十里

西至舊禺州二百五十里

北至南儀州二百二十里

東北至舊瀧州二百四十里

西北至容州一百二十里

正北微西至南儀州二百二十里

西南至舊潘州八十里

東南至本州長樂里連接高州良德縣界

戶

唐開元戶三百八十八

皇朝管戶六百二十八只言主戶

風俗

穀熟時里閭同取戌日為臘男女盛服椎髻徒跣聚會作歌悉以高欄為居號曰干闌三日一市

土產

苔蘂香樹生冬時採葉煎之氣甚芳澤尤宜洗阜衣

信宜縣舊二鄉今四鄉漢端溪縣地屬蒼梧郡隋為懷德縣

唐武德四年析懷德縣置信義縣仍置南扶州貞觀中改為賓州取州界羅賓為名皇朝太平興國初改為信宜 廢懷德縣在州東六十里本屬灌

州後來屬 廢潭峩縣在州西南八十里唐武德四年分信義縣置 廢特亮縣在州西北七十里唐武德四年分信義縣置已上三縣皇朝開寶廢入信宜 潭峩山在水中峩峩焉 特亮山在河洞水北昔有白牛夜出光影照林村人以牛光影為特亮故名 河洞水

昭州

昭州平樂郡今理平樂縣秦為桂林郡地平樂縣漢屬蒼梧郡

宋屬始建國齊屬始安郡梁置樂州隋為始安郡之平樂縣唐武德四年平蕭銑置樂州領平樂永

豐恭城沙亭四縣貞觀七年省沙亭八年改爲昭
州取昭潭爲名按湘南記云長沙郡本潭州亦取
昭潭爲名則彼此皆有昭潭郡北有昭岡潭只在
江中潭蓋以岡爲名天寶元年改爲平樂郡乾元
元年復爲昭州皇朝開寶五年併永平縣入平樂
仍廢富州之思勤馬江二縣入龍平一縣來屬

元領縣三

今二

平樂

恭城

一縣廢

永平

併入平樂

廢富州元領縣三今一

龍平

二縣廢

思勤

馬江

併入龍平

州境

東西一百九里

南北二百一十里

四至八到

東北至東京四千二百里

西北至西京四千六百七十五里

東北至長安四千九百三十五里

東至賀州三百里

南至龔州三百五十里

北度嶺至永州六百里

西至石腳村三十三里接桂州陽朔縣界

東南至賀州富川縣界八十六里

東南至象州三百五十里

西北至桂州荔浦縣八十里

東度嶺至道州四百三十里

戶

昭州唐開元戶二千三百三十四

廢富州唐開元戶一千二百九十

皇朝都管戶主三千七百八十五客一千三百四

十

風俗同賣

土產

壽竹 紅蕉

平樂縣一鄉州所理漢荔浦縣地屬蒼梧郡晉置平樂

縣唐貞觀二年省沙亭縣併入也 木客郭仲產

湘州記平樂縣樂山多曲竹有木客形似小兒歌

哭行坐衣服不異于人而能隱形山居崖宿至精

巧時出市易作器人亦無別就人換借此皆有信
義言語亦可解精器木理也 目巖山在縣北三
十五里盛弘之荊州記云平樂縣西南數十里有
山其巖間有兩目如人眼極大瞳子白黑分明因
名爲目巖山 平樂江在縣東八十里江中有懸
藤灘犁壁湍 荔浦江在縣西五里桂州荔浦流
入當州 廢沙亭縣在州西三十五里唐證聖元
年置聖祿二年廢 廢永平縣在州東九十里隋
縣舊屬藤州唐屬昭州皇朝開寶五年併入平樂
縣 沙亭水在舊縣西北出陽海山

恭城縣

東北九十里元二鄉

唐武德四年析平樂置

龍平縣

一百六十二里元二鄉

漢臨賀縣地吳置臨賀郡梁分

臨賀置南靜郡又改爲靜州仍改南靜郡爲龍平
縣屬富州唐武德九年廢安樂博勞歸化三縣入
至皇朝開寶五年廢富州以思勤馬江二縣併入
龍平縣隸昭州 廢富州城本開江郡理龍平縣
秦桂林郡地漢屬蒼梧郡之臨賀縣吳孫權置臨
賀郡梁武帝分臨賀置南靜郡陳爲靜尉郡隋始
安郡之龍平縣唐武德四年平蕭銑置靜州領龍
平博勞歸化安樂開江豪靜蒼梧七縣尋又分蒼

梧豪靜開江三縣置富州九年省安樂縣貞觀八年改爲富州以富川水爲名天寶元年改爲開江郡乾元元年復爲富州移于古武城郡爲理所彈丸溪溪中石如彈圓鰕魚有四足含水仰天不動小鳥就飲因而吞之 盧耽廟在縣界 齧鼠山多篔竹篔音箴竹多刺池澤中有鼠齧食之一名竹鼠 白土坑嶺表錄云白土坑在富州城北隅其土白膩郡人取以爲貨終古不竭今五嶺婦女率皆用之爲粉又名鉛粉 廢安樂縣在縣東北五里 廢歸化縣在縣北三十五里 廢博勞縣在縣北三十二里已上三縣唐武德九年廢 廢馬江縣在縣南一百里隋開江縣唐長慶三年桂管觀察使殷侑奏以開州有開江縣名同按圖經云其江是後漢伏波將軍馬援所開請改爲馬江縣從之 廢思勤縣在縣北一百四十里漢臨賀縣也已上二縣皇朝開寶五年併入龍平

蒙州

蒙州

蒙山郡今理立山縣

土地所屬與桂州同漢武帝平南越

置蒼梧郡今州卽蒼梧郡之荔浦縣地隋開皇十年置始安郡隋化縣唐武德四年置南恭州割荔

州之立山東區純義三縣分置嶺政縣貞觀八年
改爲蒙州取州東蒙山爲名十二年省嶺政入立
山天寶元年改爲蒙山郡乾元元年復爲蒙州州
東蒙山下有泉源流爲蒙水山下人多姓蒙

領縣三

立山 正義 東區

州境

東西 缺

南北 缺

四至八到

西北至東京五千六百七十五里

西北至西京五千七百九十二里

西北至長安五千五百一十二里

東至舊富州九十里

西至龔州陸路三百五十里

西北至桂州九十里

北至桂州三百三十里

西南至龔州三百五十里

東南至梧州嶺九十里

西北至桂州荔浦縣八十里

東北至舊賀州富川縣北郁洞二百里

戶

唐開元戶一千五十九

皇朝戶主二千五百七十七客八百一十二

立山縣二州所理漢荔浦縣屬蒼梧郡隋分荔浦置

隋化縣武德四年改為立山于縣置荔州尋改為

恭州貞觀八年改蒙州理此邑

正義縣西北二十三里元二鄉唐貞觀五年置純義縣屬荔州

永貞元年改為正義避憲宗之諱

東區縣東南八十里二鄉唐武德五年分立山置屬荔州貞

觀六年屬鸞州十年改屬蒙州郡國志云有蚰蛇

大數丈圍可一丈吞鹿食之鹿爛則繞樹腹中骨

穿鱗出又有文魚如鱮有鳥名山鶴毛羽朱素鮮

明皎然可愛禮謂鶴雉是也

潯州

潯州潯江郡今理桂平縣秦屬桂林郡漢以後並屬鬱林郡隋

為鬱林郡之桂平縣唐貞觀七年置潯州領桂平

陵江大賓皇化四縣十二年廢潯州以四縣屬龔

州尋復置潯州以桂平大賓皇化來屬省陵江入

桂平縣天寶元年改為潯江郡乾元元年復為潯

州

元領縣三

今一

桂平

二縣廢

皇化

大賓

已上二縣併入桂平

州境

東西五百里

南北缺

四至八到

東北至東京四千八百里

東北至西京五千七百里

北至長安取梧桂路五千九百六十里取象州路

四千四百三十五里

東至龔州一百二十里至廣州水路九百二十五

里

西至邕州七百二十里

南至容州四百二十五里

北至象州二百一十里

東北至龔州大同縣界二百二十里

西南泝流至貴州二百二十五里

西北至象州陸路二百一十里

東南至廢繡州八十里又至所屬阿林縣一百二

十里

戶

唐開元戶一千九百三十

皇朝戶主三百三十二客八百八十一

風俗無

土產

不出絲蠶

桂平縣

舊一鄉今二鄉

漢布山縣鬱林郡所治隋為桂平縣

唐武德二年屬貴州貞觀初屬鸞州七年屬潯州

十二年州廢屬龔州後復置潯州于此 廢皇化

縣在州東三十里漢阿林縣屬鬱林郡隋置皇化

縣後廢貞觀七年復置龔州又復屬潯州 潯江

在縣北二十步過州東五里合鬱江 廢大賓縣

在州東四十里漢布山縣地已上皇化大賓二縣

皇朝開寶五年併入桂平縣 堂牛布山故縣地

有堂牛常與蚌同穴角如玉光瑩堪作酒罇其牛

嗜鹽以皮裹手塗鹽入穴探之舌澁者是牛稍稍

引出舌滑者是蚌出則能殺人

校勘

昭州

平樂縣 總序

唐貞觀二年省沙亭縣併入也

按新唐書地理志平樂縣武德四年析置沙亭縣貞觀七年省今記不載置沙亭之始又以七年為二年恐誤又下文序廢沙亭縣云唐證聖元年置聖厯二年廢與總序不合當是記最後廢置前後互見耳

太平寰宇記卷之一百六十三終

太平寰宇記卷之一百六十四

嶺南道八

康州 領廢龍州

封州

梧州

康州

康州

晉康郡今理端溪縣

秦屬南海郡二漢屬蒼梧郡晉分置

晉康郡宋齊已下因之隋平陳廢晉康郡以所領

縣屬端州大業三年罷州為信安郡今高要郡是

也唐武德四年分置南康州都督督端康封新宋

瀧等州九年廢都督府及康州貞觀元年又置南

康州十一年廢十二年又置去南字天寶元年改

太平寰宇記卷之百六十四
為晉康郡乾元元年復為康州皇朝開寶五年平
廣南仍廢康州諸縣入端溪縣隸端州尋復舊從
部民之告請也至六年又廢瀧州開陽建水鎮南
等縣入瀧水一縣來屬康州

元領縣四

今一

端溪

三縣廢

晉康

悅城

都城

已上三縣廢入端溪

廢瀧州元領縣四今一

瀧水

三縣廢

開陽

建水

鎮南

已上三縣併入瀧水

州境

東西三百三十五里 南北五百九十里

四至八到

北至東京四千七百六十里

西北至西京舊圖經五千一百五十里

西北至梧州一百三十里

南至高州五百八十里

北至廣州化蒙縣一百九十里

東北至新州新興縣一百八十里

東南至賓州三百二十里

東北至廣州懷集縣二百里

西北至封州一百里

戶

康州唐開元戶八千

廢瀧州唐開元戶七百一十四

皇朝管二州戶主客共一千四十九

風俗

康瀧一同並夷獠相雜

康州土產

大甲香 鈎藤 烏藥 鮫魚皮 荆楊樹一名豕樹

皮白味如脂異物志云斯調州有木名摩樹汁如脂

廢瀧州土產

舊貢石斛 其土草多卷施拔心不死離騷謂之

宿莽 出禹餘糧 果有棠山海經云其味如李而無核食之使人不

溺又有古斗樹猶番禺多荔枝

端溪縣今四漢舊縣屬蒼梧郡晉于縣分置晉康郡

隋廢郡併入端州唐武德後分置康州 端山吳

錄云端溪縣有端山輿地志云有樹冬榮其子號

太平寰宇記卷之一百六十四
三
曰猪肉子大于杯卽此也 定林山下有石方正似牀其傍羅生韶子堪食又有金林山一名思黃金山俚人有岑班者入山採伐遇一寶珠圓徑五寸始以爲石遂取以歸及夜光明照燭舉柵朗然俚人甚懼以火燒之光雖小損頓更明徹猶照一室如白日也客有請之千金遂秘而不出也 廢晉康縣在州西南七十里本隋安遂縣唐至德二年改爲晉康 廢悅城縣在州東八十里本隋樂城縣屬端州唐武德五年割屬康州改爲悅城縣今爲悅城鎮 廢都城縣在縣西南四十五里漢

端溪縣地已上三縣併入端溪縣今爲都城鎮 思嗜山 程溪水在都城縣東百步亦名零溪水 南越志云昔有溫氏媪者端溪人也居常澗中捕魚以資日給忽于水側遇一卵其大如斗乃歸置器中經十許日有一物如守宮長尺餘穿卵而出媪因任其去留稍長五尺便能入水捕魚日得十餘頭再長二尺許得魚漸多常遊波中澹洞媪側媪後治魚誤斷其尾遂逡巡而去數年乃還媪見其輝光炳耀謂曰龍子今復來也因得之蟠旋遊戲親馴如初秦始皇聞之曰此龍子也朕德之所

致詔使者以赤珪禮聘媪媪戀土不以為樂至始
安江去端溪千餘里龍輒引船還不踰夕至本所
如此數四使者懼而止卒不能召媪媪殞葬于江
陰龍子常為大波至墓側縈浪轉沙以成墳土人
謂之掘尾龍南人為船為龍掘尾即此也 龍母
媪墓在悅城鄉東

瀧水縣

東北一百八十里
舊二鄉今四鄉

本漢端溪縣地屬蒼梧郡

晉分端溪立龍鄉縣即今州理梁分廣熙郡置建
州又分建州之雙頭洞立雙州隋改龍鄉為平原
縣又改為瀧水縣 廢開陽縣在縣東三十五里

本隋廢縣唐武德四年分瀧水置今為開陽鎮

廢鎮南縣在縣北九十里本隋安南縣唐至德二
年改為鎮南縣今為鎮南鎮 廢建水縣在縣北

六十里唐置已上三縣皇朝開寶六年廢入瀧水

縣併廢州額仍隸康州入為建水鎮 廢瀧州本

開陽郡土地所屬自漢以上與康州同晉分端溪

置龍鄉縣今州即其地南越志云龍鄉縣屬廣熙

郡梁大同中分廣熙置建州又分建州之雙頭洞

立雙州即此是也隋煬帝初廢州置永熙郡唐武

德四年平蕭銑置瀧州天寶元年改為開陽郡乾

元元年復爲瀧州 廢永寧縣唐武德四年于安
遂縣置藥州領安遂永寧安南永業四縣貞觀中
廢藥州以永寧屬瀧州本隋永熙縣武德五年改
爲永寧 三鼎石今名三奠石 鼎石神郡國志
云有鼎石之神在于江中隨波出沒卽赤松子鍊
水玉金丹處側有赤松子祠存 思勞洞有思勞
之水出焉 按南越志云晉康郡本屬蒼梧端溪
縣晉之咸康四年分置端溪縣古岷之營去郡上
水一百里又古茫石大而極高有樹冬榮子曰猪
肪大如杯其肉如肪炙而食之其味似猪肉而美
甚焉有夫限音純縣其俗柵居實惟俚之岷落焉民
夷曰獬夷名也 又異物志云悅城縣北一百里
餘有山中出樵石每歲人採之琢爲燒器民亦賴
也

封州

封州

臨封郡今理封川縣

卽漢蒼梧郡之廣信縣也晉以前土

地與晉康郡同梁置梁信郡兼置成州隋平陳廢
梁信郡改成州爲封州煬帝初州廢爲封川縣屬
蒼梧郡唐武德四年平蕭銑復置封州天寶元年
改爲臨封郡乾元元年復爲封州

領縣二

封川 開建

州境

東西一百一十七里 南北二百九十四里

四至八到

北至東京水陸相兼五千里

西北至西京水陸相兼五千五百里

西北取桂州路至長安六千五百八十里

東至廣州五百餘里

西至梧州六十九里

南至康州一百三十里

北至賀州三百六十六里

東南至康州一百二十四里

西南至康州一百一十三里

東北至廣州游水縣一百六十里

西北至梧州五十五里

戶

唐開元戶八百

皇朝戶主客共一千一百三十二

風俗 同康州

人物

陳欽漢書云封川縣陳欽字子逸漢武時治左氏傳故三輔決錄云元傳左氏遠在蒼梧卽欽也

土產

貢鮫魚皮 春紫筍茶 夏紫筍茶 榛牛 都

落布 牛黃

封川縣五州所理漢元鼎六年置廣信縣屬蒼梧郡

在封水之陽梁置梁信郡隋平陳改置成州隋末州廢爲封川縣移理封川口屬蒼梧郡唐武德初置封州于此縣 豐壽山在縣東南四十里高一

百三十丈多藏雷電霹靂土人呼爲霹靂山 麒麟山在縣北八十里高五百丈以居人莫麒麟所

居姓名名之 西江水在縣西一百三十步源出

邕州經潯融象彬等州入藤容梧至當州合桂江水按南越志云漢元鼎六年自巴蜀徵夜郎兵下牂柯會番禺卽此水 封溪水在縣北十四里源

出賀州馮乘縣經州界 班石山在縣東六十里其石五色故曰班石山有風穴類苑云風出蒼梧

者草多芳蘭 龍石山出石膏

開建縣北一百七十里今二鄉 漢封陽縣屬蒼梧郡晉永嘉三

年析置開建縣屬南靜郡隋大業十一年因賊廢
唐武德五年依舊置仍隸封州 定黨山在縣北
七十里高六百丈 波羅水在縣北二十八里出
廣州泅水縣南流入縣界 靈鼠石在縣東二十
里 萬家石在縣北五十里

梧州

梧州

蒼梧郡今
理蒼梧縣

秦屬桂林郡漢為蒼梧漢書云即漢

武帝元鼎六年開置也兼置交州領郡七理于此
晉以後並因之梁初廢屬成州隋平陳改為封州
煬帝初州廢入蒼梧永平二郡地唐武德四年平

蕭銑置梧州領蒼梧豪靜開江三縣貞觀八年割
藤州之孟陵賀州之綏越來屬十二年廢豪靜縣
天寶元年改為蒼梧郡乾元元年復為梧州

元領縣三

今二

蒼梧 戎城

一縣廢

孟陵

併入
蒼梧

州境

東西一百七十里

南北三百五十六里

四至八到

西北至東京五千里

西北至西京五千四百里

西北取桂州路至長安六千三百里

東至封州五十里

西至藤州一百五里

南至義州二百七十五里

北至賀州二百六十里

西北沿流至舊富州三百二十里

西南泝流至藤州一百里

東北至賀州四百一十里

正南徼西至義州三百里

戶

唐開元戶一千一百六十

皇朝戶主一千一百八十八客四百九十九

風俗

南越至新寧縣多俚獠善爲犀渠左太冲所謂戶有犀渠又云暘夷之甲以錫箔飾之雜以丹漆照輝昱晃左思所謂暘夷勃盧

人物

士燮

蒼梧人爲交趾太守弟壹合浦太守次弟翦九真太守翦弟武南海太守兄弟並爲列

郡震服百蠻尉
佗不足喻也

土產

白石英 石栗 白栗 龍眼 荔枝 按地理志廣信縣多

龍眼荔枝生于山溪人家亦種之

蒼梧縣 舊二鄉今六鄉 漢蒼梧縣治廣信縣即今州治也隋

立蒼梧縣于此置郡 白鶴觀在州西隔江壇側

生白石英唐開元二十七年置咸通末鄭畋自翰

林承旨學士謫官蒼梧太守增修觀宇臨江建水

閣因題詩云松陰如幄水如羅秋盡山青白鳥過

獨坐一菴心正寂數聲何處竹枝歌

戎城縣 南二十里舊二鄉今五鄉 本遂城縣屬永平郡隋開皇十

一年屯軍于縣南歌羅洞改為戎城縣屬感義郡

唐永徽六年復隸梧州 廢孟陵縣在州北九十

里本漢猛陵縣屬蒼梧郡蕭銑僭號于此改置孟

陵縣潯江皇朝開寶四年併入蒼梧縣 通星山

在城外昔太守劉曜常登之仰觀星斗故以通星

為名 金石山在州東南四里 石乳山在州西

四里 石英山在州西桂江口上生石英下有靈

泉因置神祠 鶴奔岡在州西一里 班石輿地

志云廣信縣之東有孤巖山有班石皆五色 金

九平寰宇記 卷之一百六十四
坑孟陵縣古錢村有金坑三所 火山直對州城
隔潯桂江水嶺表錄云梧州對岸西火山山形高
下大小如桂林獨秀山山下水澄潭其深無極其
火每三五夜一見于山頂每至一更初火起匝其
頂如野燒甚者廣十餘丈食頃而息或言其下水
中有寶珠光照于上如火上有荔枝四月先熟以
其地熱故名火山也核大而味酸其高新二州與
南海產者甚佳五月六月方熟沈佺期常有詩云
身經火山熱顏入瘴鄉銷卽此山也 冰泉在城
內一郡人民皆飲此水唐大厯三年容州經畧使

元結撰冰泉銘蒼梧郡城東二二里有泉焉出在
郭中清而甘寒若冰在盛暑之時蒼梧之人得以
解渴泉與火山相對故命之曰冰泉以變舊俗銘
曰火山無火冰泉無冰□□□□甘寒可徵鑄金
磨石篆刻此銘置之石上彰厥後生 三河口漢
陳雉升爲太守嘗釣魚于此 鰲魚池在州北一
里 西安江 天雷江 銅石江 側銅江皆郡
邑之江水也 長洲在州西七里潯江心對戎城
縣周迴六十里闊五里有居人百餘戶多以糟酒
爲業又土諺云郡中甘橘多被黑蟻所食人家買

黃蟻投于樹上因相鬪黑蟻死甘橘遂成 思良
江在州北二十里一名多鹽水其中鰐魚狀如鼉
有四足長者二丈皮如鯁魚鱗南方謂之鰐魚亦
以爲鮓口長七寸兩邊生齒如鋸恆在山澗伺鹿
亦能啖人故谷汲者往往遇害馬乳如沙土卵如
鴨卵或白或赤可食死後頭骨枯牙骨朽落隨更
生如此一歲一生骨朽爛都盡則已 盧耽祠嘗
時設祀頗有靈昔耽仕爲州治中有栖仙之術善
解飛步每日輒凌虛歸家曉則還州嘗元會至曉
不至不及朝列化爲白鵠飛至閣前迴翔欲下威

儀以帚擲之得一隻履耽乃驚還就列內外左右
莫不駭異時步隲爲刺史意甚惡之便以狀列聞
遂至誅滅後數載耽出遊半載每還莫有識之者
乃題城門曰城郭雖存無時年欲知此書盧耽還
太守削之而隨削更生焉 又搜神記云扶南傳
云扶南王范尋常養虎五六頭養鰐魚十數頭若
有犯罪者與虎不噬與鰐魚不噬乃赦之無罪者
皆不噬 又南越志云建陵縣在建水中因爲名
有山多鍾乳及石英開烟採影潤達風雨 又猛
陵縣西接永平安析縣也山榮翠羽故周書王會

九平寰宇記 卷之一百六十四
篇云蒼梧翡翠亦出于交趾 又新寧縣西接臨
賀富川二縣有獨足鳥啄腳皆赤藻縟相輝 又
遂成縣有夫任山有巨人跡文理分明在山頂長
三尺六寸山東有銀穴俚人常採煉沙成銀 又
廣寧故縣去郡東沿流有金翰鳥啄如玉腳如金
號曰商羊水之神也 又思安縣去郡沿流七百
里北接廣信縣隔大江有石井泉源湧注而不竭
又多苦竹竹醜苦也有黃苦竹有白苦竹東越
謂之高苦竹也 又安析縣突波羅樹生絕石懸
崖性至堅白壅腫盤結堪爲器焉 籠都縣刺史
陸徽所立有巨石四面峻嶮俚人謂之乳石以爲
名也西北二百里孫皓分州立石之處 又丹
成縣西南有銅山有銅湖有硃砂銅銀也 又營
石縣生營石因以爲名今冷石也古人鑿之爲器
用號爲五侯石

校勘

康州 總序

唐武德四年分置南康州都督府

按此按舊唐書地理志而書然武德初但
置總管七年方改爲都督府恐誤又按新

太平寰宇記卷之一百六十四
唐書地理志置康州在武德六年元和郡縣志唐會要皆在五年當考

瀧水縣

按南越志云晉康郡本屬蒼梧端溪縣晉之咸康四年分置

按晉書地理志云穆帝置晉康郡今云咸康乃成帝時

古岷之營

按此文多舛謬古岷之營他本文或作之又古茫他本或闕茫字又實惟里之岷落按太平御覽載沈懷遠南越志云晉康郡夫振縣民夷曰獬其俗柵居實惟俚之域落又載南州異物志云廣州南有城曰俚與今記所載大意畧同而字畫訛誤者如里作俚岷落作域落之類今無此書可考

太平寰宇記卷之一百六十四終

太平寰宇記卷之一百六十五

嶺南道九

鬱林州 領廢牢黨平琴三州

澄州 象州

賓州

鬱林州

鬱林州 鬱林郡今理興業縣 秦為桂林郡漢改為鬱林郡後漢

亦同梁置定州又改為南定州隋平陳又改為尹

州煬帝初為鬱州尋改為鬱林郡隋末廢唐麟德

三年分貴容二州置鬱州乾封元年改為鬱林州

領石南興德鬱平等縣天寶元年改為鬱林郡乾

元元年復為鬱林州皇朝開寶五年併鬱平興德
兩縣入興業縣為州治七年又併牢州之定川岩
川二縣入南流縣又併黨州之容山懷義撫康善
勞四縣入南流縣來屬鬱林州

元領縣六 今二

興業 南流

二縣舊廢

石南 潭栗

二縣新廢

鬱平 興德

廢牢州元領縣二

定川 岩川 並併入南流

廢黨州元領縣四 平琴州廢入

容山 舊平琴州管 懷義 舊平琴州管 撫康 善勞 已上併入

南流

州境

東西九十里 南北一百三十六里

四至八到

東北至東京六千一百里

東北至西京六千五百里

太平寰宇記 卷之一百六十五
北至長安取象桂州路六千六百里

北至貴州九十二里

東至容州一百五十里不通水路

南至容州陸川縣八十里

西至太平軍石康縣地名土竇分界五十里

東南至舊牢州五十里

西南至太平軍永鄉界六十里

西北至貴州八十九里

東北至容州四十里

戶

鬱林州唐開元戶一千九百一十七口九千六百

九十九

廢牢州唐開元戶一千六百四十一口一萬一千

七百五十二

廢黨州唐開元戶一千三百口七千四百

皇朝二縣管戶

缺

鬱林州風俗

廢牢州
與此同

夷人居山谷食用手搏酒名都林合糟共飲夜泊
以縱媯音瑤死則打鼓助哀孝子尤恐悲泣刻木契

焉

廢黨州風俗

古黨洞夷人索婦必令媒人引女家自送相見後復即放女歸家任其野合胎後方還前生之子例非已肩女以烏色相間為裙用緋點綴裳下或腰領處為冶艷男椎髻女散髮徒跣吹笙巢居夜泊

土產

貢布

興業縣 舊二鄉今四鄉 本石南縣地唐乾封元年置今為州

理所 廢石南縣漢鬱林郡之地梁置定州陳置

石南郡隋改為縣初置于此 廢潭栗縣以上二

縣舊廢 廢鬱平縣隋為縣屬貴州後來屬在興

業唐武德四年分鬱林置以上二縣皇朝開寶七

年併入興業 北斗山在州西北十里 東斗山

在州東北十二里

南流縣 東南九十里舊三鄉今四鄉 唐武德四年析容州北流縣

置屬容州貞觀十一年改智州為牢州以縣來屬

皇朝徙于定州水口為理 廢牢州本定川郡理

南流縣秦為象郡地二漢屬日南郡吳省晉平吳

復置宋分置南流郡齊梁為定川郡隋屬合浦郡

唐武德二年于今夷州義全縣置義州五年改為

智州貞觀十二年改爲牢州以牢石爲名天寶元年改爲定川郡乾元元年復爲牢州本蜀郡徼外蠻夷地漢牂柯郡地 廢定川縣在廢州西北四十五里 廢岩川縣以上二縣是貞觀十一年分南流縣置皇朝開寶七年同廢入南流 牢石高四十丈周迴二十里州因此爲名 馬拔營 平烏石 獸頭石以上皆郡界之山名 廢黨州本寧仁郡理善勞縣卽古西甌所居秦置桂林郡漢爲鬱林郡唐置黨州或爲寧仁郡與平琴州同土俗西至平琴治所二十里建中二年廢平琴州入

理容山縣其善勞縣在容山縣東二十里 廢善勞縣舊黨州之理所 廢撫康縣在廢州東十五里 廢容山縣曾爲黨州之治所 廢懷義縣在舊州西北二十里以上四縣與州同置皇朝開寶七年同廢入牢州南流縣屬鬱林州 京觀征古黨洞殺俘虜處 北有漸大山狀如寶塔一曰寶塔山 大龍山山形似龍以上並廢黨州之事 廢平琴州本平琴州理容山縣漢鬱林郡地唐置平琴州建中二年併入黨州元領容山懷義二縣尚列于廢黨州其福陽古符已絕基址舊長慶時

管戶七百四十西至鬱林州九十里東至黨州二
十五里其蠶歲八熟多翡翠孔雀其地近海 鮫
魚狀如團扇口在腹中而方尾間有刺傷人甚毒
皮可裝刀靶 鰐魚狀如鼉四足身長二丈口長
四尺齒如鋸食人爲窠生卵如鵝子大死後骨已
枯齒落更生朽盡始止 猩猩郡國志云封溪有
猩猩如黃狗人面善言聲音如婦人 蚺蛇長十
丈以婦人衣投之則蟠牙六七寸辟不祥 沈懷
遠南越記云鬱林郡其地嘗龍龍有聲音如踐空
地又鬱平縣有石井半甘半淡俗名司命井井周

給闔境也又南有石室空開虛映皎潔凝明中有
石人有石床可容百許人坐北有山枕倚相望塵
境互窳越烏滸之民 檳榔樹如椶櫚高七八丈
無柯枝上有十許葉正月結房一房二百餘子花
甚香每生卽落一籜籜堪爲扇至五月熟大如雞
子以海蠶殼燒作灰名曰蛤奔灰共扶留藤葉和
而嚼之香美除口氣久食令人齒黑故南中有雕
題黑齒之俗 椰子樹似檳榔而高大葉長一尺
無陰陽結實一房生三十餘子如瓜其殼中有肉
如熊白味似胡桃內有漿汁清如水甜如蜜飲之

愈渴殼堪爲酒器皮堪縛船土人多種 人面木
春花夏實秋熟皮味甘酸實有核似胡桃兩邊如
人面 龍眼木實大如彈子肉大甜也 桃榔木
似櫻欄心中出麵 益智子似廉薑香如荳蔻
犀牛有角在額上其鼻上又有一角食荆棘冬月
掘地藏而出鼻辟不祥 銅船郡國志云馬援造
銅船濟海旣歸付程安令沈于渚天晴水澄往往
望見船樓上恆似有四寸水不知幾十丈也一名
越王船

賓州

賓州安城郡今古越地秦桂林郡也漢改桂林爲鬱
理嶺方縣林又爲鬱林郡之嶺方縣自漢迄隋並爲嶺方縣
地唐貞觀五年析南方州之嶺方思干琅琊三縣
南尹州之安城凡四縣置賓州十二年省思干縣
天寶元年改爲安城郡至德二年改爲嶺方郡乾
元元年復爲賓州皇朝開寶六年州廢省琅琊保
城二縣入嶺方一縣隸邕州當年復置賓州從本
部民之所請也

元領縣三

今一

嶺方

二縣廢

琅琊 保城

州境

東西 缺

南北 缺

四至八到

東北至東京五千里

東北至西京五千五百三十五里

北至長安五千五百一十五里

西北至邕州二百四十五里

西北至澄州八十八里 通典云一百二十里

南至涪州二百五十里

東至貴州二百二十五里

東至貴州潮水縣界九十七里

東北至嚴州一百九十里

東北至象州三百二十里

北至象州武化縣馬嶺為界一百里

戶

唐開元戶一千九百七十六

皇朝戶主客五百四十七

風俗

嶺外邑居猶有冠冕之風其姓陸者績之遺嗣尙有銀章青綬銅虎符鄉宗重之皆云績物也說文曰綬青綬也其俗有禮會擊皮鼓吹葫蘆笙以爲樂

土產

貢藤桌 生思磨竹 思禮竹 蠍蝟蟲郡國志云形如

彈新美可食子如蠶種著草葉中得其子則母飛來就謂之青鳧東哲云青鳧可以還錢或云青蚨

錦鳥似雀而大 又有丹翠鳥

嶺方縣七鄉漢音縣屬鬱林郡武德四年屬南方州貞

觀五年改爲賓州 廢琅琊縣在州東二十里唐

武德四年析嶺方縣置 廢保城縣在州東八十

里梁置安城縣于此唐至德二年改爲保城縣已

上二縣皇朝併入嶺方縣

澄州

澄州賀水郡今理上林縣漢鬱林郡嶺方縣地唐武德四年平

蕭銑置南方州領無虞琅琊思干上林止戈賀水

嶺方七縣貞觀五年以上林止戈琅琊嶺方屬賓

州八年改南方州爲澄州天寶元年改爲賀水郡

乾元元年復爲澄州皇朝開寶六年併爲上林一

縣屬邕州當年復置從本部民之請也

元領縣四 今一

上林

三縣廢

止戈 無虞 賀水以上併入上林

州境

東西缺 南北缺

四至八到

東至東京四千里

東至西京四千六百九十五里

北至長安五千六百三十五里

東至賓州一百六十五里

東南至賓州八十八里

西南至邕州二百四十里

東至嚴州二百二十六里

西北至泰山四百三十五里

戶

唐開元戶一千八百二十

皇朝戶缺

風俗同柳州

土產

貢金銀

上林縣三州理所漢嶺方縣地唐武德四年析置上

林縣 廢止戈縣在州西八十里本漢嶺方縣地

廢無虞縣在州東北三十七里唐武德四年析

嶺方縣置 廢賀水縣在州東北一百一十里唐

武德四年析柳州馬平縣置以上三縣皇朝併入

上林 博邠山 羅富山 賀水 武齊水 吉

東水以上皆郡邑之山水也

象州

象州象郡今理秦屬桂林郡二漢屬鬱林郡吳又分

置桂林郡晉宋齊皆因之隋平陳置象州因象山

以為名煬帝廢州為始安郡之桂林縣唐武德四

年平蕭銑復置象州領陽壽西寧桂林武仙五德

五縣貞觀十五年省西寧割廢晏州之武化長風

來屬天寶元年改為象山郡乾元元年復為象州

皇朝開寶元年廢嚴州併歸化入來賓縣屬象州

領縣三

陽壽 武化 武仙

廢嚴州元領縣二 今一

來賓割屬象州

一縣廢

歸化 併入來賓

州境

東西四百二十七里 南北二百五十七里

四至八到

東北至東京四千二百六十里

北至西京四千六百八十五里

北至長安五千九百二十五里

東至龔州二百六十五里不通馬

西至柳州馬平縣二十七里

南至貴州三百里

北至柳州象縣一百六十里

東南至潯州桂平縣一百五十里

西南至澄州界二百一十七里

東北至西唐州一百九十里

西北至柳州二百里

戶

象州唐開元戶五千五百

廢巖州唐開元戶一千八百五十九

皇朝戶主一千一百三十四客一千三百六十

風俗同繡州

土產

人面子樹葉似龍眼而長也有古紵俚人績以為布尚書云島夷卉服此也

陽壽縣舊二鄉今四鄉漢中留縣地屬鬱林郡吳于縣置鬱

林郡又改為桂林郡隋改為象州仍改中留為桂

林縣唐武德四年改為武德縣于縣界置象州貞

觀中移州于武化天寶元年八月改武德為陽壽

大曆十一年復移州歸陽壽即今理

武化縣東六十里舊四鄉今二鄉漢潭中縣地屬鬱林郡隋置建

陵縣屬桂州唐武德四年析建陵置武化縣屬晏

州貞觀十二年廢晏州來屬仍自武德縣移象州

于縣置非秦之象郡秦象郡今合浦縣也大曆十

一年移州歸陽壽樂宜舊城程郎水一名思傍

水在邑界

武仙縣東北九十里舊五鄉唐武德四年析桂林置仙人山

嶺表錄云象州武仙縣舊有神仙集眾高山羽駕

時見如建州武夷山皆有仙人換骨函在象山

在州城西岸去城五里高四十丈其形如象山因

得名銅鼓瀨又有銅鼓山俱在郡界浣泥溪

太平寰宇記卷之九十五
雜夷山居之所 鬱林水合鬱水出相陵南山以
上皆郡邑之山水 風母獸似猿無尾眼赤見人
則低頭藏面如似有罪輒向人叩頭打死人開其
口向風便生異物志云謂之平猴 鼠獸長四尺
馬蹄牛尾如猿有兩乳其聲如嬰兒一母唯一子
其溺地一瀝成一鼠出則歲灾 苦姑鳥聲如人
音多懷慘悽異物志云謂之苦姑鳥 懶婦獸異
物志云昔有懶婦織于機中常睡其姑以杼打之
恚死今背上猶有杼文瘡痕大者得膏三四斛若
用照書及紡績則暗若以會眾賓歌舞則明

來賓縣

西一百五十里舊二十四鄉今二鄉

元屬嚴州與州同置皇朝

開寶七年廢嚴州併歸化入來賓縣屬象州 牂
柯水郡國志云嚴州州門有長水深八丈從牂柯
流下 廢嚴州禹貢荊州之域漢武帝平南越卽
象郡之地也歷晉宋齊梁不改後爲獠所據唐乾
封三年招致生獠置嚴州及三縣地在嚴岡之側
因爲名天寶元年改爲修德郡乾元元年復爲嚴
州 廢歸化縣與州同置亦同廢

太平寰宇記卷之一百六十五終

...

...

...

...

...

...

...

...

...

...

...

...

...

...

...

...

...


...

...

...

...

...



程